

Tesalonaika ali leta bagubagunana

Paulo ana lelelele

Walo bagubagunana

Tesalonaika iya taon lalakina Masidoniya polovinsi kalona mena. Paulo ana takikili labuina kalona mena ilau Tesalonaika na ana guguye koina tomo tupwali ali meli sipei Yeisu koina. (Apositolo Ali Paisowa 17:1-4). Na Yudiya tupwaliyao Paulo ana walo kaiwena simunamunai lalakina, mwa yanuwane kalona mena sitalawauwau (Apositolo Ali Paisowa 17:5-9). Kabo tomeliwo Tesalonaika koina Paulo siyawasa ilau Beliya bwaine koina iguguye, imwawasi kabو ilauyoi taon lalakina esana Ateni bwaimwa Akaya polovinsi kalona mena. Akaya esana labuina Gilisi. Saugana Paulo iyaele Ateni, inuwanuwatu Tesalonaika tomeliwo kaiweli kabо Timoti iyawasa kolili (3:1-2 yo 5). Kabo Paulo ilau Kolinita yo Timoti ipileyoima Tesalonaika koina yo Paulo ilobai Kolinita koina (3:6 yo Apositolo Ali Paisowa 18:5). Saugana Paulo Tesalonaika tomeliwo wasali ibenalan Timoti koina kabо leta bwaite ilele yo iyawasa kolili. Siya tomeliwo waluwaluli Tesalonaika koina siya kamkamna silobalobai ali meli kaiwena, kabо Paulo nuwanuwana ikabiyakaiweli (3:3-5) yo iwalo-kalatagili ali miyamiya kaiwena (4:1-12).

Tesalonaika tomeliwo tupwaliyao nuwali ipwanopwano siya tomeliwo siboitako kaiweli. Sineli siwaloba, “Saugana Yeisu ipileyoima, gubesi, kani tomeliwo siboitako yawasi miyamiya yaina silobai o nigele?” Kabo ali nuwapwanopwanone Paulo iyadudulai (4:13-18) yo ikabiyakaiweli sikatububunagili Yeisu ana pileyoima kaiwena (5:1-11).

1 ¹Yau Paulo mekaukavao Sailasa yo Timoti letane bwaite kalele kayawasa ilaowa tomeliwo Tesalonaika kolimiу, komiu kwamiyamiya Yaubada Tamala yo Guyau Yeisu Keliso kolili. Kakawanoi Yaubada ana katekamkamna yo ana nuwa-daumwali katemuи iloyakalapowonli.

Paulo iyaliyaya Tesalonaika ali meli kaiwena

²Saugana tem kakawanoi kaiwemiu, sauga meuloina kakawatoki Yaubada koina komiu meuloi miu kaiwemiu. ³Sauga meuloina kakawatoki ala Yaubada Tamala koina kaiwena kanuwatu-kalatan tawae kwapaipaisowai ami meli koina, yo kwapaisowa kaikaiwe kaiwena kamikavao kwamuloloili, yo wakalakisye kaiwena me ami katepatu kwasanasana ala Guyau Yeisu Keliso ana pileyoima kaiwena.

⁴Kamakavao yo dumayao, kakatai yakato Yaubada imuloloimiu yo igite-sipwaimiuko komiu iya ana tomoyao. ⁵Nige ama walomo kaiwena na kwanuwabui na ama guguye ana kaiwe yo tabe Yaluyaluwa Tabuna ana paisowa kolimi kwalotonan kabo wasana namwanamwana wakawa-yawasosiyen. Yo tabe tauna kona kamiyamiya luwamiu mena mumugamai meuloina wakataiyako yo ama sagu kolimi wagitaiyako. ⁶Wasana namwanamwana wakalai imiyamiya kolimi kabo mumugamai besiele kai mumugamai yo Guyau mumugana. Bwagana siyakamkamnamiu lalakina na iyamo wasanane kwameliyan yo Yaluyaluwa Tabuna ana yaliyaya katemu iloyakalapowonli. ⁷Kabo komiu kwaemala kaba gite tomeliwo meuloi li kolili siya simiyamiya Masidoniya polovinsi yo Akaya polovinsi kolili. ⁸Na bwaite Guyau wasana kolimi kwayadebalalayako ilau Masidoniya yo Akaya kolili yo tabe ami meli Yaubada koina wasana idebalalako ilau dedei meuloina kolili. Kabo nige sowasowana kai kaedeedede kaiwemiu, kaiwena tomo meuloi li wasamiu sibenalanako. ⁹⁻¹⁰Na tomone siya wasamiu sibenalanako siya mwa ama wasa siyeyama yakato tauna kona kalaowa yo me ami yaliyaya kwayoganmai, ama guguye kaiwena kokotomo kwasikotanagili na kwapwalou Yaubada yawasosi meyawasina koina yo kwaemala ana topaisowa yo ami meli kwapei Natuna Yeisu koina yo ana pileyoima bulibuli mena kaiwena kwasanasana. Walo yawasosi iya mwa Yaubada ikele-yatoloyoiyama boita mena kani ileboila na Yaubada ana munamunai ilalaoma kani nige talobai.

**Paulo yo mekanakavao ali paisowa tauna kona
Tesalonaika koina kaiwena iedeedede**

2 ¹Kamakavao yo dumayao, wakatai tauna kona ama laowa kolimi kanna iyawatagiliko kolimi. ²Beyabeyana kalau Pilipai tomo siyakamkamnamai yo sikawa-naenae-yagimai kabo muli mena kalaowa Tesalonaika kolimi ala Yaubada isaguimai kabo me ama katepatu wasana namwanamwana kayawasayan kolimi. ³Saugana kayoganimiu mwa kwameli Yeisu koina, nige yakayakatai

mwakomwakotana yabo kayayakayakatai-yani kolimu, nige yakato nuwatu naenaena kaiwena kapapaisowa, yo nige yakato katonatonan tem kamwakota-yagimi. ⁴Na kawalowalo besiele Yaubada ana nuwatu, kaiwena Yaubada iya igite-sipwaimai yo imeli-yagimai wasana namwanamwana kayawasayan dudulai mena. Nige yakato katonan tomo kakabi-yaliyaya-yagili, na katonan Yaubada kakabi-yaliyaya-yan, iya mwa katemai itonatonan. ⁵Komiu wakatai walo luviluvina nige kawawaloweni yakato nuwamu kakoi. Yo tabe Yaubada ikatai nige yakato ami wasawasa kamamankikiwasi-yani na kayakayakatai kolimu, nigele. ⁶Nige kanuwanuwatui yakato tomo sitobalanagimai, tem komiu o nuwana analiyao tabe.

⁷Kai Keliso ana tosagenawasao (apositoloyao), tem sowasowana kakawanoi sagu kaiwena kolimu kaiwena kai esamai silalaki na iyamo saugana kamiyamiya kolimu nige kaginauli besiele, mumugamai ibiga besiele sina yabo natunao igitekalatagili. ⁸Sauganane koina kamulolo lalakina yo kayaliyaya kolimu. Nige yakato Yaubada wasanamo namwanamwana iya bwaite kaeeyawa kolimu, na tabe yawasimai katalamwani kolimu, kaiwena komiu kwalaomako kwaemala ama eliyamwao namwanamwaliyao. ⁹Kamakavao yo dumayao, gubes, kwanuwatu-kalatan tawae kaginauli saugana kamiyamiya luwamu mena? Saugana kamiyamiya luwamu mena paisowa polopolowena kapaipaisowai nimamai mena kaliyate yo boniyai kolili na ama paisowane maisana kakalai kaeyawa kolimu kama gitekalatan kaiwena, na tabu kayayapolowemiu. Tabe besiele Yaubada wasana namwanamwana kayakayakatai-yani kolimu. Kaginauli besiele, awa?

¹⁰Komiu wakatai yo tabe Yaubada ikatai, saugana kamiyamiya komiu tomeliwo luwamu mena, me ama yakasisi yo mumugamai meuloina idudulai, nige kama kawa-naenae yabo. ¹¹Kaiwena wakatai mumugamai kaigeda kaigeda kolimu besiele tama yabo mumugana natunao kolili. ¹²Saugana kamiyamiya luwamu mena samalulu mena kakabi-yakaiwemiu na mesabana ami miyamiya Yaubada ana kaba yaliyaya, iya bwaimwa sauga meuloina iyogayoganmiu na kwalusae ana kaba loina wasawasana kalona mena.

¹³Besiele tabe sauga meuloina kakawatoki Yaubada koina, yaina kaiwena saugana Yaubada ana walo kwabenalan kolimai, nige wakakalai besiele tomo ali walo, na wakalai besiele Yaubada ana walo. Na walo yawasosi bwaimwa Yaubada ana walone ipaipaisowaya komiu tomeliwo katemiu mena. ¹⁴Kamakavao yo dumayao, tawae iyawatagili Yeisu kana tomeliwo Yudiya polovinsi koina iyawatagilikoi tabe kolimiu. Kaiwena komiu kamkamna kwalobai ami yanuwa tomoliyao kolili, besiele tabe tomeliwone Yudiya polovinsi kamkamna silobai ali yanuwa tomoliyao kolili bwaimwa tomo Yudiya. ¹⁵Na siya tomo Yudiyane

palopitao bagubagunalni siunuili yo tabe Guyau Yeisu siunuyamate yo kai simalimali-wagimai. Sikalomagigili tomo meuloili kolili mwa siya Yaubada ana kaba okwatakawata. ¹⁶Tabe siya tomo Yudiyane sitonatonan yakato sikausimai tabu kayayakayakatai siya nige Yudiya kolili na lebo silolobai. Ali kalomagigili koina sauga meuloina ali pwanoli sietu-etulan. Kabo bwaite sauga Yaubada ana munamunai imiyamiya kolili.

Paulo nuwanuwana lalakina tem Tesalonaika tomeliwo iboeyagili yoi

¹⁷Kamakavao yo dumayao, tauna kona tomo Yudiya simalimali-wagimai, mwa kalogabaegimiyo sauga kubwakubwana koina kamiya-suwala kolimi. Nige kagigitaimiu, na iyamo iyaele kanuwanuwatuimiu. Na nuwanuwamai lalakina tem kalaowa kagitaimiu, kabotanon kaikaiwe na tem kaginauli besiele. ¹⁸Kai nuwanuwamai kalauyoia na kagitaimiu. Yo yau Paulo sauga ibaibaiwa yatonan kaiwe, na iyamo Seitani ikausimai. ¹⁹Nuwanuwamai kagitaimiu, kaiwena komiu ama nuwatu ana kaba kaiwe, ama kaba yaliyaya yo ama kaba gagasa ala Guyau Yeisu Keliso manna mena saugana tem ipileyoima. ²⁰Walo yawasosi, komiu ama kaba gagasa yo ama kaba yaliyaya.

Paulo Timoti tauna kona iyawasa ilau Tesalonaika

3 ¹⁻²Saugana kai ele kamiyamiya Ateni, kanuwanuwatu lalakina kaiwemiu yo nige sowasowamai tabe kakalakisiye, mwa ama nuwatu kaginauli kabo Timoti kayawasayawa kolimi na yomai labuine kamiyamiya Ateni. Timoti iya kalakava yo mekamakava kapaipaisowa Yaubada kaiwena yo Keliso wasana namwanamwana kaguguguyeyan. Iya kayawasa ilaowa na mesabana isaguimiu na ami meli ikabiyakaiwe, ³na kwatolo kaiwe ami meli koina tabu kwamamatausi kamkamna kana lotonan kaiwena. Wakataiyako Yaubada iwalo kamkamna besiele bwaite kani talobai. ⁴Tauna kona kai mekamakavao komiu, na sauganane koina kawalowalo-kalatan kolimi yakato kita kamkamna kani talobai. Na wakatai namwanamwai iyawatagiliko besiele ama yanuwapei kolimi tauna kona. ⁵Kabo bwaite iya kaiwena Timoti yayawasa ilaowako. Nige sowasowagu tabe yakalakisiye, na yayawasa ilaowa ami meli igitai. Sauganane koina yamiyamiya Ateni yakelewaka kisi Seitani iya tosamasamalulu isamaluluimiu na ama paisowa kolimi iyamala ginauli bwagabwaga.

Paulo Tesalonaika tomeliwo wasali ibenalan kabo iyaliyaya

⁶Na Timoti iyaele ipileyoimako kolimai yo wasa namwanamwana kaiwemiu iwalowenako kolimai. Iwaloba ami meli koina iyaele kwatotolo kaiwe yo me ami mulolo kamikavao kolili. Tabe iwaloyoi yakato sauga meuloina me ami yaliyaya kwanuwatu-kalatagimai, yo nuwanuwamai

lalakina tem wagitaimai. Besiele tabe kai ama nuwatu lalakina tem kagitaimiu. ⁷Kamakavao yo dumayao, kai besiele komiu sauga bwaite kamkamna yo polowe kalobalobaili. Na saugana ami meli wasana kabenalnan mwa kaiwena kakatepatu. ⁸Mwa koina me ama yaliyaya yo kama lotonan inamwanamwa yo kamiya namwanamwa kaiwena kabenalnan komiu kwatolo kaikaiwe Guyau koina. ⁹Kaiwemiu ama yaliyaya ilalakisosi ala Yaubada manna mena. Kabo ama yaliyayane ana lalaki kaiwena, kani tawae kaginauli na kakawatoki Yaubada koina? ¹⁰Yo kai kalyate yo boniyai kakawakawanoi kaikaiwe Yaubada koina na tem kalaowa manimiu kagitaili yo ginauli tupwaliyao kayakenayagimiui ami meli kana etulan kaiwena. ¹¹Kabo kakawanoi Tamala Yaubada yo ala Guyau Yeisu, siya ama kamwasa sikitububun na kalaowa kolimiui. ¹²Kakawanoi ami mulolo kamikavao kolili Guyau ikabi-yalalaki, kabu ami boda yo tomo meuloili kwamuloloili lalakina besiele kai kamuloloimiui lalakina. ¹³Tabe kakawanoiyoi iya ikabi-yakaiwemiu yo ami meli ikabiyamatuwa, kabu saugana tem ala Guyau Yeisu ipileyoima me ana boda yakayakasisili meuloili kani ileboimiu komiu Tesalonaika tomeliwo me ami meli yo nige kami yakewa yabo na iyamo me ami dudulai Tamala Yaubada manna mena.

Miyamiyane bwaite Yaubada ana kaba yaliyaya

4 ¹Kamakavao yo dumayao, ama edeedede kana etulan bwaite. ²Kayakenayagimiuko ami miyamiya mumugana ana lau na Yaubada iyaliyaya kolimiui, yo walo yawasosi, komiu iyaele mumuga bwaite kwapaipaisowai. Kabu sauga bwaite Guyau Yeisu esana koina kakabi-yakaiwemiu yo kawalo kolimiui mumuga bwaite kwayalalaki kolimiui. ³Na loinaone bwaite silaomaya Guyau Yeisu koina mwa kaeliwa kolimiui wakatailiko. ⁴Yaubada ana nuwatu kaiwemiu besiele bwaite. Kwayakasisi-yagimiui yo mumugamiui sidudulai na mesabana ganawali mumugana kwasikotanan. ⁵Komiu kaigeda kaigeda ilonamwayan yona gubesi ana loiloanayanna kabu sowasowanu mumugana idudulai na mesabana kana gite inamwanamwa tomo kolili.^a ⁶Tabu yomiu kwatatalamwagili ganawali nuwatunane koina, besiele siya tomo nige Yaubada sikakatai mumugali. ⁷Tabu komiu yabo naenaena iginauli kanakava koina o tem mwakota mumugana iginauli koina na wainena iganawali. Kaiwena tomo siya bwaite mumugaliyao besiele signaginauli Guyau kani iyamaisali, besiele tauna kona kayanuwapeimiuko. ⁸Mwa Yaubada iyoganla nige yakato ganawali mumugana tapaipaisowai, na

^a 4:4 4:4 Walone bwaite kana bui kamwasa labui. Kamwasa uloi bwaite besiele. Komiu kaigeda kaigeda ilonamwayan wainena mekanakava simiya namwanamwa kabu sowasowanu mumugana idudulai na mesabana kana gite inamwanamwa tomo kolili.

tayakasisi-yagila yo mumugala sidudulai. ⁸Kabo yaiya tem yakayakatai bwaite ikawa-naenae-yani nige yakato tomo ikawa-naenae-yagili na Yaubada ikawa-naenae-yani iya mwa Yaluyaluwa Tabuna iyeyawa kolimiu.

⁹Nige sowasowana yaleleleleyoi kolimiu yawalo kamikavao kolili kwamulolo kaiwena emulomulolo mumugana Yaubada iyakenayagimiuko. ¹⁰Tomala walo yawasosi kamikavao meuloili Masidoniya polovinsi koina kwamulololilik. Kabo kamakavao yo dumayao, kakabi-yakaiwemiu mumugane bwaite kwayalalaki kolimiu. ¹¹Wakaiwemekamikavao kwamiya daumwali, tabu tomo uloili ali paisowa yo ali nuwatu kolili kwanuwanuwatu, na kwabomamo nimamiu kwayapaisowaili ami miyamiya kaiwena, besiele tauna kona kawaloko kolimiu. ¹²Tem waginauli besiele bwaite, kani nige sowasowana ginauli yabo koina kwadeva. Tabe siya nige simemeli kani siyakasisi-yagimiui ami miya namwanamwana kaiwena.

Guyau ana pileyoima walona

¹³Kamakavao yo dumayao, nige nuwanuwamai nuwamiu sipwanopwano ami tali tomeliwo siya siboitako kaiweli. Tabu komiu ami nuwatu besiele siya nige tomeli ali nuwatu. Siya nige ali katepatu ipapagani kaiwena ali nuwatu yakato nige toloyoi mwa me ali nuwanae ali toboitao kaiweli. ¹⁴Na kita tameliya Yeisu ana boita yo tabe ana toloyoi koina, kabotameliyo tem siya simeliko Yeisu koina yo sibota, Yaubada kani ikele-yatoloyoili yo mekalikava Yeisu kani sipileyoima. ¹⁵Gubesi, yakato kita bwaite meyawasila tamiyamiya kanasiga kalyatenane koina Guyau ipileyoima tabaguna kabomuli mena siya siboitako? Nigele, nigele molosi. Guyau Yeisu iboma bwaite kainana mwa kawalo-masalan kolimiu. ¹⁶Saugana aneloseyao ali tobaguna iwalu Yaubada ana bwagigi siyui, kabotameliya Yeisu Keliso iyoga yo ilobima bulibuli mena yo siya toboita simeliko koina kani sitolo-baguna. ¹⁷Imwawasi kabotameliya Yeisu kani sitolo-baguna kainana mwa kawalo-masalan kolimiu. ¹⁸Koinaele walo bwaite wakalai na mesabana kaigeda kaigeda wakabikabi-yakaiwemiu.

Tasilasilawa yo takatukatububu Guyau ana pileyoima kaiwena

5 ¹Kamakavao yo dumayao, nige sowasowana kalelelele kolimiu na kawalo toisabo sauga kani ginauline bwaite siyawatagili, ²kaiwena wakatai namwanamwai Guyau ana kalyate pileyoima ana sauga laoma besiele tokewali ana yawatagili boniyai luwaluwalina. ³Saugana toyauyaule siya nige ali nuwa-mayale siba, “Yanuwane imiya-

daumwali yo tamiya namwanamwa”, kabu sauganane koina kani nae yabo iyawatagili kateyapitali mena yo isibayanaeli. Ana yawatagili kolili besiele sine ana kabi kamkamnana kana yakateyapitali. Na naene kani nige siyayabubu-gabaen.

⁴Kamakavao yo dumayao, komiu nige kwamiyamiya boniboniayi mena na yakato kaliyateneane katemu iyiapitali besiele tokewali ana laoma. ⁵Komiu meuloimiu kaliyate yo mayale natunao. Kita nige boniboniayi ana dedei tomonliyao besi. ⁶Kabo kita tabu takekeno besiele tomo yauyauleli, na tasilasilawa na taboma tasikotanagila naenaena koina. ⁷Kaiwena siya tokeno, boniyai koina sikeno, yo siya tonuma kabakabaleya, boniyai koina sinuma kabaleya. ⁸Na kita kaliyate ana dedei tomonliyao, tabomayoi tasikotanagila naenaena koina, meli yo mulolo mumugana takalai talikwa, besiele tokaleya gamwagamwalina kana kokaukausi aeyan ilikwa. Besiele tabe, katepatu mumugana na tasanasanai Yaubada ana lebo takalai tapwaom besiele kala pwaopwaom kaikaiwena. ⁹Kaiwena Yaubada nige igigitesipwaila na ana munamunai kamkamnana kamnana talotonan, na igitesipwaila na ala Guyau Yeisu Keliso koina lebo takalai. ¹⁰Yeisu iboita kaiwela na saugana ipileyoima, nuwana meyawasila o tem taboitako, kani meuloila meyawasila mekalakava tamiyamiya. ¹¹Koinaele, kamikavao wakabi-yakaiweli na simatuwa besiele sauga bwaite waganiginauli.

Tomeliwo kali walo kaiwe tupwaliyao

¹²Kamakavao yo dumayao, nuwanuwamai kawalo kolimu kwayakasisi-yagili siya sipaipaisowa luwamiu mena, bwaimwa siya sibaguna-yagimu Guyau ana paisowa koina yo siyakayakatai kolimu. ¹³Paisowa bwaite signaginauli kana nuwatu ilalaki kabu kwayakasisi namwanamwaili yo kwamulolo lalakina kolili. Kamikavao mekamikavao kwamiya-daumwali. ¹⁴Kamakavao yo dumayao, yakabi-yakaiwemiu siya tolobwgabwaga nige sipaipaisowa kwawalo-yasanapuli, tomatausi wakabi-yakateyapatuli, siya tobeluwo kwasaguili yo tomo meuloili kolili me ami kalakisye. ¹⁵Wagite-kalatagimi tem tomo yabo naenaena ipaisowai kolimu, tabu komiu yabo iyayamaisa besiele koina. Na kwatonan sauga meuloina mumugamiu inamwanamwa kamikavao kolili yo tomo meuloili kolili.

¹⁶Sauga meuloina yaliyaya katemu iloyakalapowonli, ¹⁷yo sauga meuloina wakawakawanoi Yaubada koina, ¹⁸yo bwagana tem ginauli yabo iyawatagili kolimu wakawa-tokimo Yaubada koina. Bwaite Yaubada ana nuwatu kaiwemiu komiu Yeisu Keliso ana to moyao. ¹⁹Yaluyaluwa Tabuna ana paisowa kolimu tabu kwayayaboita. ²⁰Tem tomo yabo ipalopisai, tabu mwayamwayau wakakawa-naenae-yani yo tabu kwawawalo yakato palopisaine ginauli bwagabwaga. ²¹Paisowa yo walo meuloina wagitesipwa namwanamwaili. Tem sinamwanamwa wakabi-

kalatagili. ²²Nae uloi uloi kwasikotanagili. ²³Yakawanoi Yaubada, iya nuwa daumwali yaina, iboma iyakasisi-yagimiyo mumugamiu meuloina iyadudulai namwanamwai. Tabe yakawanoi Yaubada iyakasisi-yagimiyo yoluyluwamiu, yawasimiyo yomiu igitekalatagili kabu saugana ala Guyau Yeisu Keliso ipileyoima, nige kami yakewa yabo imiyamiya. ²⁴Yaubada iya iyoganmiu, sowasowana kana meli kwapei yakato kami yakasisi iginauli.

²⁵Kamakavao yo dumayao, wakawanoi kaiwemai. ²⁶Nimamiyao kwayaga-yagili ami tali tomeliwo meuloili kolili yo kwaemulomulolo-wagimiyo, kaiwena komiu Yaubada ana tomoyao. ²⁷Guyau esana mena yakabi-yakaiwemiyo leta bwaite kwayasili tomeli meuloili kolili sibenalan. ²⁸Ala Guyau Yeisu Keliso ana katekamkamna imiyamiya kolimiu.